

江
西
詩
徵

江西詩徵卷五十二

南城曾燠賓谷編輯

明

周紹亞

紹亞吉水人成化初官內黃訓導

朱仙鎮岳王祠

南渡擎天一柱摧塵沙滿眼實堪哀金戈北伐心何壯鐵
馬南還志已灰雁字傳哀天外去河聲流恨月中來我今
謁廟瞻遺像痛挹椒漿奠一杯

陳 卨

卨字邦達寧州人家貲甲於一邑成化初邑大祲

盡出其粟以活民崇祀鄉賢

明山觀

路入名山景漸佳
水杯流處汎胡麻
鸞驂高駐空中馭
藜杖遙尋物外家
石迸靈泉通一竅
庭環琪樹落三花
我來欲問無生術
不見青牛駕羽車

羅倫

倫字彝正永豐人成化二年進士廷對第一授翰林修撰坐論事貶泉州市舶副提舉尋召還復職改南京以疾辭歸閉門教授垂十年卒諡文毅有一峯集

蒼夏憲副止菴見贈

高堂明鏡萬莖秋屋上西風撼不周盤沼且留明月住買
山初爲白雲謀誰呼鐵笛先招鶴白著蓑衣早放牛道在
莫須同出處此心還向止菴求

荅涪守張兼素

昨夜清風度碧山蓑衣初振水雲間流年信我添華髮世
路逢君祇厚顏深樹黃鸝間自語落花飛燕傍誰還柴門
已與山童約明月今宵不用關

春光容易落花輕世路山河算幾程芳草可憐諸老去好
風偏爲故人清也知蝴蝶渾閒夢卻笑獼猴亦世情老子
婆娑眠不著五更寒極敝裘橫

題張氏水村小景

逢著閒人只點頭海邊伴我是沙鷗多情芳草舊知己如意好山都上樓白髮以前渾是夢黃花相與又逢秋年來解得濠梁意卻笑游魚誤中鉤

節婦歌

泉流不歸山雨落不上天妾心死不同金石無其堅白日經中天飄忽沉西海妾心日不如瞳瞳光不改明月揚清輝三五二八圓又虧妾心月不如耿耿無虧時憶妾二十春結髮事良人安知三載後羅帳生素塵懷中五歲兒零落重悲辛吾聞陳孝婦夫死養姑心愈固朱幡入秦丹書來黃金北斗高門戶又聞杞梁妻慟哭梁山傾精神變天地黃土非無情妾髮可剪妾頭可截妾心之白不可涅

遊麻姑山

魯公忠義心曾子春秋筆兩公天地間千古雙白日伊人
無遺文麻姑今已失麻姑在何處吾道未得一嗟嗟劉張
輩亦此留遺跡人生盡自重歌竟長嘆息

會仙堂招飲

使君一舉三百觴山穀雜陳麟脯香醉後大笑出門去魯
公風骨山蒼蒼

垂玉亭

麻姑稅駕知何年神仙有無誠杳然浪說桑田變滄海青
山依舊飛寒泉

崇正堂

雲和草樹拂天香無盡光中有紫陽萬籟一空天似水滿
船風月武丘堂

洗天雷雨過南山佳氣無邊紫翠間長嘯一聲空浩劫白
雲飛盡老僧閒

陳員韜遺愛亭

棠樹陰陰手自我年年春日領春來道傍芳草無人問一
度東風一度灰

唐張九齡志徐孺子碣陳憲章題憲副夏正夫邀倫
同和憲使陳煒文曜刻石東湖亭上聘君子季登及
陳蕃禮宜侑享故及

黨錮諸君宿草寒西山南浦謝盤桓莫煩使者空懸榻懶

逐羣兒學挂冠未有煙花驕我老只餘風月倩人看生芻
一酌東湖水幾許清光入肺肝

聞道東都萬古悲可堪人事與天時羣雄睥睨嗟何及一
代人才尙有師黨籍儘教諸子與天機微許此翁知解嘲
莫笑揚雄論誰奉陳蕃入此祠

天秀宮

野仙臨玉笥引袖拂天星侍立雙童小看山隻眼青洞雲
含雨潤鶴夢帶烟醒自歎羅浮客春杯溢四溟

湓峰山

一柱高峰戀紫霞數聲雞犬也仙家春風不與人分破添
得碧桃無數花

湧雪亭

王風一委地異端乃橫行鳳鳥久不至蛙黷紛吠鳴風雨晦白晝虹蜺橫太清使君遊丹霞道士吹紫笙元鶴自天翔仙犬花間迎使君謂道士當宁憂蒼生老夫荷天澤痼哉此孤癡因觀魯公碑豈慕麻姑名王事傷靡盬載驅用經營黃冠亦黔首慰我萬古情

寄東山真覺寺性定

說法誰能不離宗歸林猶聽去時鐘空畱大藏三千卷獨住東山第一峰世外自拚隨落葉門前誰與護長松尋幽憐汝過支遁早是深公未易逢

和緝熙過毛英懋西園隱居

曾次還餘五畝春。草堂雲暖小山貧。塵中物色原無我。林下心情見此人。鶴伴野翁梳白髮。蝶隨春色上烏巾。褰衣細問西園老。怕有人家可竝鄰。

和緝熙畱別

甲子流年又幾巡。東風初散馬蹄頻。自憐白髮添明鏡。悵望青天入暮春。寒日臥龍遲遠夢。冷花幽鶴伴芳辰。相逢且盡樽前酒。無那滄波欲送人。

林緝熙歸會于薌城梁宅和洪城見寄

雲水千峰更萬峰。此心期與故人同。蒼茫世路浮生在澹泊。春杯野興空鄉夢。幾回茆店月蓑衣。無恙柳花風。明年喚取陳公甫。皂帽青天信一蓬。

和緝熙同春書臺

萬玉峰頭自在春暖雲晴雨爲誰貧誰知別樣風花手只
屬羸衣澹蕩人芳草漫同康樂夢野花羞傍紫陽巾卽呼
猿鶴留君住莫向東家更買鄰

題薊城梁得剛書屋用林緝熙韻

乳燕鳴鳩甲水濱小軒幽徑足聽聞生忘芳草翻疑夢寒
盡梅花剩得春世事暗隨燈燼落年華偏愛老翁新芒鞋
竹杖身長健頻上金牛醉野人

題漢宮圖

白蛇中斷赤旗開四百年中夢兩回惟有終南舊山色雨
餘猶自送青來

別廷揚

釀得新城萬頃春
碧桃扶醉不辭頻
羅浮山下梅花屋
夢裏逢君恐未真

和林緝熙題宣和殿臨韓幹馬

夢入黃鸝紫殿陰
天津空費杜鵑心
宣和玉輦君休問
老在西風五國林

龍瑄

瑄字克溫宜春人世襲武職遂爲金陵人與邱仲深羅葵正陳公甫爲布衣交有聲江湖間自號半閒居士有鴻泥燕居諸集

山居雪中

風抱茅簷雪擁門山居牢落易黃昏
平頭踏凍春粳米骨
朽煨煙煮菜根萬事由他愁不得一寒如此樂猶存
清歡
今夜須拚醉傾倒何妨甕酒渾

平樂府

淒淒烟雨嶺南天翠壁青林斷復連
山縣總荒兵火後土
民還住賊巢邊車筒晝夜翻江水刀
具春秋種石田幸際
時和太平日不須鷄骨預占年

荆山鄉思

驛廳長晝思依依坐看晴簷柳絮飛
斜日鳥呼春不住東
風雁比客先歸山程迢遞淹征轡
野水微茫夢釣磯卻憶
舊居江口市雨香蘋藻鱸魚肥

和南村春興

朝來携杖到前溪
風暖花香滿袖携
郭索近晴穿草出
鉤輅長日隔林啼
松陰野廟將春社
茅屋人家正午雞
眼底韶光盡詩景
酒廬僧舍漫留題

客夜

寂寥孤館掩黃昏
滿抱羈愁誰與論
時候早寒淮北地
田廬多潤海邊邨
天凝蜃氣朝猶暗
風雜潮聲夜復喧
幾夜強眠眠不得
擁爐枯坐欲銷魂

徐霖

霖字用濟金谿人成化二年進士官給事中言事
出知嘉興府致仕歸屢薦不起有惕齋詩集

白水渡

水宿天明早舟人戒曉程遠天涵樹影高岸瀉溪聲柔櫓
真饒舌青山不易名海霞初旭爛容易掩長庚

惠明院

寺小無人到尋幽興有餘缺牆通市犬敗壁倚齋魚產薄
官租重年荒佛供疎野情終不愜歸路重欷歔

西林院

寺傍古路頻年過乘興停驂一訪僧竹石剩添仙島畫煙
霞深護佛龕燈日長鷗吻喧雛鵲水落魚梁立老鷹靜對
白蓮思靖節濁醪休更著膏騰

霽谷山

一峰愁絕倚高寒石磴遙登數百盤望眼天清堪萬里吟
魂風快已孤翰萍浮高下烟村密地拆東南水府寬歎志
數年今始遂願回塵面受飛湍

過桂家林

荒村春水浸柴荆烏柏青林打麥聲小市魚鹽初長價古
祠香火不知名郵籤晷刻當亭午驛路風光際太平人世
可能求一飽紛紛鴉雀笑勞生

自南湖憩崇仙觀

南湖西埭演陂陀處處青山映綠波興倦偶停遊客馬書
成不換道人鵝空庭老鶴橫雌樹古砌蒼苔上女蘿無事
懶行城外路春風花鳥奈愁何

廣壽寺

闕佛誰教復惹僧
鄭壇何處許君登
吟腸百匝轉輪藏
佛法多年最上乘
廊靜獨行成迤邐
臺高凝望覺凌兢
居閒剩有三山興
海翻長風迥莫勝

宿正覺寺

城東野色滿招提
負郭腴田水浸堤
雲際帆檣山遠近
柳邊車馬路東西
芳塘淨水魚離劫
小圃清陰鶴有蹊
暫借禪窻息泥鞅
樽前風味付蔬畦

尊勝院

山縣鐘鳴說放衙
老僧晨起著袈裟
禪床寓客渾無夢
祇樹棲鳥別有家
佛界此心眞水月
海天何地更烟霞
少年

遊處偏增悵閱盡優曇幾度花

遊沖雲院

綠樹清波落景涵石磯雙鏡夾寒潭千林橘柚居民樂十里風煙瘦馬堪芳社勝遊誰惠遠恒沙餘劫此瞿曇江湖行腳真成懶蔬笋盃盤分自甘

玉石臺

諸公有句題金石玉石詩應待我來山水何年還應識乾坤此地慣生才白沙雨過平孤堰綠樹雲深閱兩臺陳跡是非誰復問但逢佳景卽深盃

筆架山

海上三山左股飛故應峰頂啟僊扉中書君老龍章隱五

大夫高鶴骨微水石巖局爭獻秀風霆神爽自生輝清遊
頭白知難再策馬聊歌緩緩歸

後山寺

清翁攜我作春遊活水源頭古寺幽山後山前幾多樹天
晴天雨一林鳩我無僧業閒猶劇君有詩才老更適珍重
行廚櫻筍樂乾坤須信此生浮

梅愈

愈字宗韓一字東園湖口人成化二年進士授工
部主事主居庸關以廉明稱陞員外郎命紀大同
功邊將嚴憚不敢干以私後知常德府乞病歸卒

江山一覽亭

石上閒亭入望齊峨然屹立大江西水聲東去雙流合山
勢南來一路低沙際日斜漁火亂崖巔花落鷓鴣啼長安
見說無多遠彈指煙波望眼迷

王相

相字樂用號恥齋新昌人成化二年進士與陳白
沙羅一峯莊定山友善官至廣東按察司僉事

親老歸養

辭官非愛一身輕返哺其如鳥鳥情膝下斑衣今日遂螭
頭丹悃幾時傾家隣潯曲秋花老船到東湖夜火明林下
有時懸一榻謾尋樂處夢周程

陳鶴

鶴泰和人成化二年進士官兵科給事中論劾不
避權貴

清節書院

道學淵源重斗山門人雲集叩柴關一生苦節林泉下千
載清風天地間春色入簾庭草翠綠陰滿砌石苔斑巖宮
況復昭遺像景仰令人起汗顏

鄧友誠

友誠信豐人成化三年貢士官寧波照磨以廉謹
聞於時

可樂亭

清閒會上總衣冠身世優游宇宙寬惟愛溪山歸勝景盡

收風雅入吟壇綸巾羽扇尋常樂翠竹黃花次第看聞道
養頭春似海諸公休只兩眉攢

南山觀

仙樓如翼擁清都形勝難爲畫史摹殿上雲霞生古壁洞
中雞犬襲丹爐紫烟紅雨有時有白鶴青鸞無日無細拂
古碑看歲月重興已是宋祥符

密竹疎松二里間洞天深鎖碧雲閒宮商律按風前籟水
墨圖開雨後山此地紫芝何處得昔人黃犢幾時還不須
遠向仙源去流水桃花自一灣

甘祥

祥字應麟南豐人霖孫成化四年鄉舉屢上春官

不第將謁選外兄李釗與李孜省有舊欲爲謀善地愕然拒之拂衣歸

孤山書舍落成

家貧幾費買山錢閒構孤山屋數椽有室好懸孺子榻無人更問米家船鶴翻松露侵窗濕燕拂林花著雨妍況是地高天咫尺題詩應近五雲邊

張昇

昇字啟昭南城人成化五年進士廷對第一授修撰遷庶子疏劾輔臣張吉十罪出爲南工部郎吉罷復故官歷禮部尙書正德初忤劉瑾詔加太子太保乘傳歸卒贈太子太傅謚文僖有柏崖集

夜上山

齋宮北上夜攀躋山影參差草色齊
眼底峯巒天遠近樹陰燈火路東西
樓臺月落人初到梧竹風敲馬更嘶
試問金釘門外客菁華多少入新題

遊萬壽峰

十里郊原半是山遊人多少浩歌還
委香花片紅千點隔樹江流碧一灣
春意著人憐我醉詩情脫口待君刪
故鄉風景翱翔處敢忘蓬萊玉笋班

圓通寺

廬阜登臨我未能連天祇見雪稜層
雲中指點渾無路山下逢迎只有僧
寶地夜寒吟對酒玉爐香盡坐挑燈
明朝

欲與匡君語白鶴傳書尙可憑

舊遊

烟波渺渺任沿洄風景無窮眼界開
幽壑樹疎僧寺出澄江空定客帆回
三聲側聽猿啼切一字橫看雁影來
旅食倦遊浮世隘不知何處覓蓬萊

題畫

村原行遍忽經秋指點青山欲盡頭
江水茫茫何處濟不知野渡有橫舟

送雲南衛知事

潭山稜層幾千丈潭水涵天不可量
茲山茲水江右奇四時風景難名狀
中有華屋何人居十年三徑荒成墟
滇南

公署日回首五更歸寢真何如秋來捧匭入京國逢著鄉
人情默默浩然一賦歸去辭從此江山有顏色買舟便問
楚西頭風光轉盼皆舊遊蒼苔踏遍吟復嘯勝境何必尋
滄洲社鼓撻殘酣社酒青袍白髮羅親友剴然一笑頓生
春樂莫樂如新聚首潭山可樵水可漁烟雲入座增歡娛
卻歎勞勞成底事紅塵終日空追趨迎仙山高傍南斗憑
君寄語迎仙叟荆扉猿鶴尙徘徊昔日神仙今在否

東林寺

廬嶽寒凝萬玉林雪山一脈到如今風烟勢重江湖近鐘
鼓聲沉殿角深竹院靜中鈴自語松巢凍後鳥長吟遠公
可在山前後蓮社寧無舊盞簪

送晉陵

遠輸公賦上皇都夢枕江山已到吳鄉思獨憐新鶴髮家
聲人說舊龍圖南舟雨後人千里東郭風前酒一壺此去
蘭陵應計日初秋風味是蓴鱸

題赤壁

曉持憲節下神京楚國秋風萬里程潭底魚龍俱避影山
中草木亦知名心同峭壁當空赤人比寒江徹底清懷古
悠然興何限坡山遊處月分明

送人遠行

臨岐分手思悠然立雨春風幾拍肩舟遇逆灘須緩棹馬
當險道且停鞭吟邊良友應能幾望裏修程動有千此日

莫嫌尊酒醉不知聚首又何年

與人話舊

邂逅逢君坐月輝
泊舟柳下近山扉
蹉跎功業休看鏡
慷慨襟期欲拂衣
流水可堪時事改
歸雲其奈故交稀
不知玉笛來何處
吹起鄉心逐雁飛

湖上秋興

數家籬落太湖邊
野老招呼夜泊船
腸斷紫簫聲裏月
眼驚青草夢中天
西來戀闕心千里
北上離家客十年
勲業不知誰復建
空勞臨鏡歎華顛

直沽

十六年來此重過
關心勲業竟如何
語無傾蓋追歡少
意

在停雲感慨多塵外幾添新館舍眼前不改舊山河勞勞
曠歲成何事洞見誰如春夢婆

和桂坡先生江上萬里圖

高人有奇趣蒲袖藏江山偶來對榻一展卷恍然坐我烟
霞間岷源一水瀉千里茅茨多少憑江灣天風怒濤起兩
耳鳴淙淙虹橋跨巨壑古樹凝蒼顏千帆飛度不知息山
中誰與雲俱閒層巒疊嶂清於染渾如巫峽分螺鬟浩歌
欲招遠遊子風光如許何當還

渡淮

長淮一道入滄溟滾滾黃流若建瓴回首故鄉何處是東
風多少短長亭

董越

越字尙矩寧都人成化五年進士廷對第三授編修上籌邊封事孝宗朝使朝鮮修憲宗實錄成擢太常卿累官工部尙書卒贈太子少保諡文僖有圭峯文集使東日錄

金精山

太白此降精本爲民祈福癡情笑番君偶爾墮汙辱聖明崇祀典乃以能出雲如何千載下只說張真人

青陽洞天

洞天三十六青陽不入書豈伊造化心欲秘環吾廬神龍多此蟄花竹亦紛敷下土或焦爛煩君吹舞雩

送胡節之還寧都

金精此去多名山，君家住處似七盤。周迴四顧皆無路，十里五里皆林巒。北通吉撫南通郡，裊裊羊腸迷遠近。客至惟聞簷鵲聲，春歸亦有梅花信。秀鍾人物已有年，雲衢高著祖逖鞭。撐腸挂腹霏屑落，揮毫灑翰銀鈎連。迢迢萬里同鄉縣，十載天涯兩相見。短刺無勞日日通，深杯也解頻頻勸。才高氣逸入駿同，暮制西池朝復東。霜蹄暫蹶未爲失，天閑十二來春風。垂楊有花飛歷亂，提壺隔樹聲聲喚。攪思牽情兩不禁，到家不覺流年換。竹林老阮吾舊遊，別來爲問相思不。萍蓬蹤跡人共老，清秋見月還登樓。君歸尙喜頭未白，更把文章細細繹。吳下阿蒙不似昔，憑君此

行一努力

蒙山

蒙頂出青州茶名徧宇宙誰知此山中亦有生雲竇旗舒
穀雨餘芳擷清明後風味如使君誰云可輕售

和師召太常留別韻

地近蓬萊尺五天青綾番直記當年多才已獻長楊賦感
舊頻歌伐木篇燭秉夜闌真夢寐車當明發且留連晨霜
匹馬趨朝路却憶南州正晏眠

和彭先生入閣述懷韻

鷗翻凌摩在絳霄玉清高處領羣僚寧無尺五歸時論會
有登三報治朝商弼夜深方入夢堯衢日出已聞謠頭顱

河西諸從 卷五十一
自信多公道白髮從渠不肯饒

孫需

需字孚吉德興人成化八年進士官南京御史劾
僧繼曉忤旨予杖外遷宏治中歷禮部尚書轉吏
部劉瑾惡之勒令致仕遂乞休歸卒諡清簡有冰
檠稿

遊德興龍潭爲詩投之

塵世仙家兩隔離遙瞻白鶴舞東西月明瑤草光浮洞春
煖桃花香滿溪兩字功名垂竹帛千年履跡印苔磯不知
羽化何年代致使凡人心自迷

李雲

雲分宜人成化八年進士授海鹽令多惠政以年
老致仕歸有雙峰集

寶雲寺

步雲橋上寶雲峯殿閣飛甍接太空記得書聲曾隔竹風
光已落畫圖中

周季麟

季麟字公瑞號南山寧州人贊子生時大父夢麟
入室因名成化八年進士由兵部主事累遷浙江
參政所至賑荒治水民賴以安擢副都御史巡撫
甘肅以靖土魯番功調薊州旋乞休卒於家謚僖
敏

南山寄興

聽到更深百八鐘
南山寺對月華濃
一尊鬪健寧論客
萬事信天誰笑僂
最愛僧閒還命駕
不妨吏隱亦看松
高懷忽起飄然念
丈室惟堪著懶慵

宿南山僧房

僧房暫假一枝安
睡覺東窓日兩竿
竹掃橫斜風憂玉
花飛上下水流湍
冠雲亭外羣峰秀
跨浦橋邊片月寒
老懶山林招我隱
遙瞻魏闕五雲端

周彥中

彥中字權別號宜齋
寧州人季麟從子有宜齋稿
龍泉山

吳楚東來僅此山
天風挾我一躋攀
參差古木烟霞外
歷亂曇花紫翠間
仙犬識人眠不起
胎禽狎客去猶還
何時喚醒塵寰夢
也伴禪僧盡日間

馬洲山谷祠

太史祠堂傍馬洲
龍陂東下鬱松楸
西江詩筆至今在
大宋文章千古留
烟鎖釣臺山漠漠
月明雙井水悠悠
經過幾度修蘋藻
落日黃雲春復秋

黎 燦

燦號敬齋新喻人
成化十年鄉舉官香山知縣

偶題

故園今在越江頭
萬里還家不自由
芳草舊遊俱是夢
黃

花新句若爲秋離心日逐飛蓬斷別淚時添野水流親老
高堂雙鬢改幾時真慰倚門愁

送黃僉事歸香山

酌酒與君江上別江空雲靜草連天不疑豈爲誣金屈范
蠡終因去國賢兩履青雲秋嶂外半篷綠水白鷗邊醉來
高臥羲皇上不管人間有幾年

送黃僉憲之任

兩層衣綠故鄉遊擬是神仙到海頭獬豸著冠今憲史麒
麟分節古諸侯鸞車滿載三春雨玉斧重磨九月秋後夜
德星移不定有懷何處倚高樓

遊楊林寺

天留勝迹倚雲津秀水晴嵐畫更真
寶藏有經分白馬上
方無力到紅塵
禪床冷浸冰壺月
茶竈香生石鼎春
遲日東風吹布谷
分明此地有閒人

廖森

森泰和人成化十年鄉舉歷官涪州知州
境內常有四虎爲害捕殺其三獨白額者不可得
乃齋沐撰檄文告城隍翼日虎斃居官十載以廉節聞於時

武山和尹直

乘興攀躋武姥西白雲深處見霜蹄
雨過石磴莓苔合風壓山樓草樹迷
漱玉泉聲依澗轉插天峰勢向人低
偶來

佳處聆佳句一洗塵習萬斛泥

黃澤

澤字文敷泰和人成化十年鄉舉知安溪縣

按通志有

黃澤字楚望乃資州人而家九江者元大德中爲江州書院山長別是一人

楊侯新先太史祠登閣致感

雙井派分魚壩遠先生祠址跨東陽沙門幾劫公仍在石
像重刊我昔藏百世詩壇懸藻鑑一篇家誠凜秋霜源流
自愧西江派敬仰遺風借隙光

葉元

元字本貞貴溪人成化十年鄉舉歷官雲南知府
並有政績廣西帥宗周煽亂率兵直搗賊巢斬首

數千級眾咸服曰老將不如也未幾卒於官

白雲菴

投暝白雲寺繞階紅葉深誰能忘世慮僧亦被塵侵煮茗
被孤悶題詩嗣雅音與闌清不寐明月到天心

白雲菴

磴破烟霞入白雲箇中渾不雜紅塵白沙翠竹橫溪路埜
鳥閒花別洞春宿客細談今古事山僧猶送往來賓風光
未盡登臨興漫酒淋漓翰墨新

天臺山

卓爾東南華孤聳天之半雲氣互吐吞上與鴻濛貫青天
歸牧人日與山娛玩會當陟其巔揮手挾雲漢

王華

華字廷光南城人成化十一年進士累官浙江僉事慎惜法紀興學育才政務犁然遷廣西副使未行而卒

麻姑山

雲山高崔嵬凜凜凌青冥停輿躡石磴直上尋眞亭虹橋
度玉淵琳館依雲屏瀑布瀉寒雪鳥聲和飛鈴天風吹我
衣天露濕我纓幾年鬱鬱懷頓覺塵夢醒桑田尙依然寂
寞桃源扁方平與麻姑安得重相盟顏碑說神仙荒唐杳
不經烈烈忠義肝萬古照汗青但使此碑在此山應有靈
丁寧黃冠子寶愛如囊錦

彭綱

綱字性仁清江人成化十一年進士雲南提學副
便有雲田集

宿鄧川驛

風走落葉聲山犬吠不已披衣夜出戶明月照溪水

姚安分司

吟客夜未眠迢迢漏初永起步山月中疎枝挂猿影

詠刺桐花

窓前刺桐樹樹底花楚楚風吹葉亂翻露出紅鸚鵡

趙璽

璽字允用南豐人禮孫成化十二年貢生判海州

致仕歸以詩酒自娛號星舟道人有北行稿敗岱集

魯公碑

寒聲泉瀑風簾洞秋色林霏水墨圖獨有顏碑渾不老長生休問煉丹爐

劉鴻

鴻字雲表自號七星居士泰和人成化十三年鄉舉才名達禁中憲宗賜以巾曰遮賜免其家徭役邱文莊倪文毅戴恭簡皆與爲忘分交有詩文集愛蓮亭

清水池塘蓮正開曉風涼雨濕濯濯千機雲錦鋪寒練萬

桐聊耳抹露杯魚鳥狎人忘去住水雲留客靜徘徊
遊
恐費郎官俸只合商量載酒來

題竹

搖搖曳曳舞青鸞夏玉敲金耐歲寒拜意主人休翦伐他
年應借釣熬竿

可樂亭

曾於海上看英雄老眼年來一半空正數洛中稱衆老又
從林下見羣公古今有幾風騷將天壤無多矍鑠翁早得
投簪同散逸醉顏不惜向君紅

南康曉行

星河影裏別南康竹色松聲引興長塵滓盡隨雲幕卷好

風清薦竹兜涼青袍白馬君能送野飯山肴客共嘗極目
雲山心更苦悠悠何處是吾鄉

法雲寺

滿眼西風落帽時偶來梵閣寄遐思山中有佛誰相契世
上何人我共期梧葉儘留題後墨曇花原是句前詩碧紗
紅袖皆如夢且把茱萸過短籬

余秉清

秉清字體乾奉新人成化十三年鄉舉授揚州府
推官擢知石屏州

越嶺雲旗

越王遺精英與雲爲聚散悠揚見氤氲彷彿飛旄幔日鑠

龍蛇文風翻熊虎亂只今盼嶺頭郁郁卿雲爛

八百石洞

仙人竟何之仙宅在人世別有蓬瀛天深藏鉛汞祕環門
流水響曲徑陰蘿翳閑道去尋真白雲自開閉

劉彬

彬字素彬永豐人成化十四年進士授程鄉令考
績赴部過家值臥病聞饒平賊陷屯程鄉力疾馳
及境請於行軍布政散兵隣邑以紓民困又雪就
擒之脅從者數百人事平晉秩

紅林寺

紅林春日多風雨古栢參天渾欲舞騷人剩得一日遊老

僧未解三生語五陵公子馬如飛
履杖閒行古所稀迢迢獨羨松門
隱相對長吟忘却歸

鍾 瓘

瓘字良玉永豐人成化十四年進士
官咸寧知縣有蛰秋漫稿

和長教陳先生

孔思周情寄一瓊春風時雨自年
年杜陵慣糴太倉米顏氏非無負
郭田仕路平生心似水故鄉何處
海連天不應昨夜還家夢已逐元
真覓釣船

壬戌九月八信豐十五夜月色如
晝詩示行實時同舟也

秋山未老尚青青
秋氣蕭森夜氣冥
千里好風行不盡
一船明月睡初醒
水中星動天疑墜
匣裏龍吟劍合靈
自信江湖甘白首
詩成誦與阿咸聽

題南山觀壁

南山遠勢連空同
山下樓臺烟霧中
東海仙人影在壁
月波道士顏如童
嵐光和雨滴春翠
丹氣接天浮夜虹
憑高一笑空宇宙
俯視下土塵濛濛

劉允中

允中字叔彝高安人
成化十四年進士
歷官禮科都給事
多所建白總理西
寧糧儲以疾乞歸

泉韻鳴琴

石竇鳴寒泉泠泠發清亮乃知太古音不在絲絃上

張如玘

如玘武寧人成化十四年貢於鄉官廣東順德主簿

柳山書院

清風淡蕩到人間一片閒雲去復還綠草萋萋深挂壁青
松鬱鬱遠臨關何時古硯浮香霧此日荒臺掃敗菅
難描蟲鳥篆墨池流水夜潺潺

張吉

吉字克修號翼齋晚號古城餘十人成化十
進士官廣西布政使以不肯賂劉瑾貶肇慶同知

卒有古城集

次韻桑民懌和晦菴先生讀道書

地幽人自罕境寂心轉虛移床傍松影臥看黃老書一息
噓吸間氤氲妙無餘孤雲其來往豈復形迹拘穠纖多異
患澹泊有真娛縹緲空中鶴一舉當何如

暮萱詩爲侍御陳秉衡題

兒有寸草心搖蕩春風裏春風有時歇兒心悲不已

遊風洞寺

驅車破蒼烟飛壑見此洞絕頂入清寒凡軀斷登玃衍然
敞今古青壁色飛動一逕徹丹崖殘碑得捫弄凌虛有高
閣遠日聊一送秋色澹江天跳出幾雲夢錯落解金魚鏗

鉦鳴鐵鳳慘淡一老僧無言守虛甕捧觴隨地主偶爾逐
吟呀嶺南雖高秋殘暑敵夏仲名區更幽賞締綵堪一謳
志適形乃忘真能變炎凍安得登吾民于于免哀痛

謁桂林舜廟

荒哉帝舜祠遠薄虞山下峭石矗垣墉香風襲蘭麝姜侯
攜我至八桂清秋暇秋色傷客心往事轉驚訝有洞不聞
韶南薰白臺榭是時蒼梧野荒僻堪夢伯崩殞固莫詳廟
享配禋蜡人心本至公萬古泣遺化祖龍死沙邱氓氓如
長夜豈徒血食廢恨不躬唾罵善惡久彌章有同口燒其
何哉三季主嗜耽忘啖炙再拜出廟門作詩聊慰藉

題劉世熙愛茶卷

陽羨山人骨不凡，食松絕粒棲翠巖。愛君不惜致筐篚，自
詫仙家風味酣。歸來畫省青春好，落花細細兼幽草。數甌
啜罷蕭爽多，漸覺沈疴去如掃。赤箭青芝世所珍，寧知此
物妙通神。神農本草偶遺略，欲著新經開後人。一爐一鼎
深相結，水火中宵猶未滅。興闌高枕神氣清，片月孤梅幽
夢切。

送李文明員外出守岳州

春風吹空淨如掃，使車緩轡東門草。法垣秋月十年孤，移
向湖南照枯槁。湖南山色雨斑斑，鐵笛仙人還未還。爲道
相思不相及，鷓鴣叫斷湘靈泣。

端午次韻答蔣世欽

浩浩乾坤大悠悠歲月過西人張宴盛北客感懷多事靡
投機括名空玷網羅好風知令節吹到遶梁歌
天涯牢落處佳節暗經過結客逢人少耽書廢事多有茅
堪醺酒無葛未更羅忽捧珠璣唾何妨恣意歌

建德館中次戴司寇韻

石徑險疑斷畦樊縛欲斜異花溪女鬢深竹野人家新旭
娛天霽紆途笑客差煖雲輕自散片片傍巾紗

重經南嶽

沿湘仍望嶽身世更茫然落影恐到海飛岑疑造天萬峯
都培塿一到卽神仙共語人何在題詩憶往年

夜宿高都驛

江驛暮投宿緣崖纜短篷枕衾烟草際魂夢水雲中役重
民膏竭年祲米價豐憂時心未了休訪避秦翁

湘江漁父詞

柳花飄盡荻芽長艇艇魚苗有數筐日晚江光看漸遠販
兒燈火下瀟湘

雷家鋪

郵亭燒燭健飛蝠賈豎歸縉喧小汀踏破月華仍有伴湘
雲如練楚山青

夜宿廣德寺

驅車遠出長林下偶共孤僧語幽榭春星半壁淡無輝獨
醉松風了清夜

莫投上葉村

白妥紅殷翠欲勻小園猶見未殘春
盤中細蕨兼新笋卻喜山家味最真

野翁短髮亂鬢鬢門外春山懶自登
獨有池魚堪飯客日斜閑放兩三簪

李忠烈公祠迎送神樂章

紛犀甲兮翠旛亂湘流兮若雲春露兮秋霜無遠無近兮
援枹執鼓折芳馨兮代舞旅牲醴兮芬熏公入廟兮有白
其駒我維公駒兮在庭之隅公不醉飽兮我呻且吁

修蛇兮縈縈猗犬兮唁唁臨衝兮第第驥騎兮說說兵血
戰兮幾盡涕橫流兮霑巾彼蒼者天兮胡不仁死爲趙氏

鬼兮生爲宋臣嗚呼我公兮人道之紀口不忍言兮心曷
其已潔我肥瘠兮稱我兕觥千秋萬歲兮祀事孔明

彭福

福字綏之號懶農樂平人成化十七年進士知泰
州以剛直罷歸

縣吏司書者爲飛稅他戶戲爲詩謝而止之

洪水推沙塞兩涯推來推去只交加誰知二世宮中鹿走
過劉家又李家

孫治

治字五美清江人成化十七年進士知臨淮縣守
正不阿以選妃責貢事爲權閹汪直所中改安東

遂棄官歸里中稱霜崖先生有鳴春集

桃花源

千樹桃開不謝花
玉樓金殿鎖烟霞
人間甲子君休問
蓬海如今漸見沙

江澂

澂字景吳南城人成化十七年進士歷知黟縣建
平寧海所至有聲臨民以誠信爲本每日黎明必
北向再拜而出累遷四川僉事清理屯田鹽法公
私皆便致仕歸

麻姑山

吁姥麻姑第一山
就中佳致異人間
碧桃滿樹春長在
丹

室無門雲自關雞犬向畱仙鼎藥龍蛇應護薛碑斑玉簫
風送月明處疑是幔亭高宴還

葉雲谷

雲谷武寧人成化十八年貢於鄉

永濟橋

茫茫素練白雲盤遠勢全收鎖石欄雷洞風烟頻出沒柳
峯猿鶴共盤桓數村落葉連深塢千里飛鴻度晚巒滿壑
仙流何處似溪聲不盡古波瀾

浮洲望諸山時老僧病起相迎

天際樓臺半有無靈芝風雨隔東湖看山道士芒鞋綻臥
病維摩竹杖扶

辛巳言復
卷三十一
三
辜 瑗

瑗字潤夫安仁人成化十九年鄉舉官夔州同知

臨池書院

方塘半畝水悠悠檻戶平臨分外幽科斗潤生湘帙雨鳬
鷗輕蕩玉壺秋鉤簾月奪華鐙艷洗硯雲隨古墨流野鳥
不來心地靜日開竹素事清修

胡承業

承業峽江人成化十九年鄉舉官知縣

靈安寺

卓錫何年築梵宮此山開久是禪宗扶疎幾箇琅玕竹偃
蹇千章翡翠松溪籟送來如伴韻野雲飛去忽聞鐘我來

不盡尋秋興直躡層霄第一峰

劉節

節字叔正泰和人成化十九年鄉舉官合浦知縣

武山和尹直

山行東折復還西一路山花襯馬蹄
禮斗臺空蒼蘚合望陽石古白雲迷
巖前泉瀑真珠灑天外峯巒紫翠低
會見天書召元老再尋舊隱隔雲泥

法華寺

綠酒黃花酬美景偏衫側帽試高秋
亭臺日落欲僧寺鼓角風清起戍樓
野老獨追彭澤興使君應比習池遊
青山繞郭堪行樂江鳥何須喚客愁

赤壁仙舟圖

仙山仙水一仙舟
錦纜牙檣載月遊
欲起東坡重作賦
西風吹夢落黃州

詹璽

璽字廷信貴溪人成化二十年進士歷官雲南左布政使所至以廉謹稱雲南多草竊不用兵力一感以誠解散其黨所全活以千計請老歸卒

通月樓

層樓高出五雲頭
明月飛來掛玉鉤
珠箔玲瓏元不夜
碧窓虛白盡成秋
無邊清景添吟興
一片寒光豁醉眸
仙谷喜看修桂樹
須教穩步到瀛洲

董時望

時望號雪峰樂安人成化二十年進士官御史剛
介不苟合豪右憚之居官三十餘年比卒無以爲
殮有雪峯稿

落星寺

騰阜風烟會波光入望幽一拳擎寺出萬里枕江流背訝
天星落今看地脈浮神京更迢遞何處望仙樓

敖毓元

毓元字化潛號定庵新喻人成化二十年進士次
年星隕上䟽言事謫雲南臨西丞携孥徑往以道
阻止於麗水與土官木泰講學曉諭西番番衆率

從孝宗知其直起知桂陽仍以直罷著有梅花百詠

矮梅

除花只論樹形神難與黃楊辨僞真立脚爲添深尺雪低頭怕見隔牆人無緣挺特凌雲漢甘學婆婆掃地塵最可笑時風影亂侏儒閒舞柘枝春

憶梅

月冷金沙獨注神玉容千里記猶真自來方外爲孤客誰向牕前問美人庾嶺有書煩去使灞橋無句步前塵天南天北冰霜隔未審空山幾日春

姚文灝

文灝字秀夫貴溪人明子成化二十年進士官都水主事繪水道圖集水利書著爲法居官廉約請託不行終湖廣提學僉事

通月樓

傑構憑空起虛窓待月開玉人常夜坐佳客趁秋來桂影分書幌蟾光入酒盃時平無一事滿意望三臺

鄒 隼

準字一平新建人幼以奇童稱九歲時方伯某宴滕王閣得黃鳥呼風當戶立之句準應聲云黑龍拖雨過江來四座驚異十歲補諸生成化二十二年鄉舉年三十二卒於京師著作多散佚

攀柳枝口占

九歲作

攀條折楊柳欲折忍著手柳上有黃鸝殷殷勸求友

江城春興

城南城北覓春光短袖輕衫野興長燕啄柳花穿客慢蟻
拖松粉上隣牆雨來磨洗舊山色風去吹噓新草香回首
白雲最高處寥天鐘鼓送斜陽

九日

倚杖西風萬戶涼客愁尊酒對重陽望迷紅樹心先醉夢
到黃花枕亦香半閣秋陰鳩喚雨一天寒氣雁呼霜憑高
自嘆乾坤窄笑拭腰間寶劍鐙

劉 啟

敵字中和泰和人成化二十二年鄉舉官賓州知州有政聲

登武山

肩輿欵欵度南巖泉竇雲峯次第探斷碣尋詩誰獨擅孤
筇入畫我還堪牽衣時恐竹梢墜捉塵且携松尾談人表
風光歸一覽滿天秋色動吟酣

試劍石

玉華一道接金華武姥重遊興尙賒試劍猶存山頂石尋
真休問鼎中砂七星洞古留詩句九疊屏開入畫家畢竟
真靈須福地倚天閒看吐蓮花

甲戌十月遊武山飲南溪蕭宅口占

江西詩徵

卷五十二

明十四

三

名山勝覽昔年曾今雨如何阻客登願得衣裳輕似鶴
風吹上最高層

東軒獨坐

桃花開落李花開山中薄酒三五杯邨西有客可人意
風雨今朝期不來

陳袞

袞字廷章號蘭坡新城人成化二十二年鄉舉歷
宰天台青田以治行著擢知儋州儋人化其德轉
汀州同知以憂歸居喪哀毀卒

卹山

絕頂龍淵照碧空亂雲殘霧一重重斜陽收拾丹青
稿畫

出溪南雪後峯

周相

相安仁人成化二十二年鄉舉

登春臺次崆峒韻

風亭銷夏迴更上宜春臺樹影千山合秋聲十日來楚雲
含薄雨吳地隱輕雷尙有花香至芙蓉石壁開

江西詩徵卷五十二

江西詩徵卷五十三

南城曾煥賓谷編輯

明

費宏

宏字子充鉛山人年十六領鄉薦成化二十三年
進士廷對第一正德中爲宸濠中傷以禮部尚書
致仕嘉靖初召還張璁桂萼排陷之復引去十四
年再召進華蓋殿大學士卒贈太保諡文憲有鷺
湖摘藁

送吳克溫南歸

都人望春信頑陰尚凝寒白日慘無光汙泥幾時乾有客

東書卷倉忙出長安問之笑不答但云報恩難無由繫馬
足把袂徒相看今朝且痛飲別後仍加飧

題蜀江圖

樊君示我蜀川圖萬里江山纔一握紙尾親題出魏公云
是逆川李生作岷山隱隱插雲端山下寒江經禹鑿神施
鬼設露端倪陰合陽開分脈絡峨峨雪嶺隔蓬婆嫋嫋繩
橋橫瀉博溪流芳膩花曾浣江色澄鮮錦初濯蛾眉淡掃
月輪高灩澦孤撐秋水落白盤赤甲形模異龍脊虎鬚聲
勢惡影疑百越看山鷗鷺愛九峯聞野鶴羣仙戲集自道
遙神女夢思猶綽約登龍飛鳳人青霄白馬黃牛出丹壑
濯唐峽口東奔湍脚底雷霆常噴薄青螺忽湧白銀盤湖

裏君山誰剗削披圖不覺塵眸醒奇徑可疑還可愕如朝
帝闕擁圭璋如赴戎行攢劍槩又如鐘磬在高懸如設丹
梯登峻閣九屏疊秀卽匡廬二室窮深更嵩洛就中地勝
每因人終古流芳眞犖犖杜從夔府稱詩聖程向涪中傳
易學獨醒亭畔誦騷辭八陣磧邊懷將畧圖窮尚有岳陽
樓志士登臨非取樂我嘗有意賦遠遊苦被浮名自纏縛
因圖寓目亦欣然更寫此詩存大畧重來借我細臨模畫
史何人解盤薄

過靈濟宮

匹馬春遊困馳逐解鞍暫憩西城足巍然雙表逼雲霄閭
苑蓬萊驚在目試窺洞府瞰仙宮碧瓦朱甍光可燭簷牙

高隊總塗金殿趾重鋪皆砌玉雕牆畫壁擁周遭坳茜爲
泥間青綠諸天相去僅尺五寸草化身成丈六塵途彷彿
遇羣眞世界依稀藏一粟龜趺屹屹載穹碑指眼含辛三
四讀乃云二闕在清都能與蒼生造冥福誰知無益只勞
民骨間椎髓心剜肉神輸鬼運諒未難卽使爲之應夜哭
憶昔鳩工庀材日徙卒頽眉車折軸是時秦王正饑苦不
雨經時巫可暴爺娘食子夫食妻米石寧論錢一斛地下
眞應有劫灰人間忍見生妖木星搖石語皆緣此下土狂
夫謂神酷誰能因鬼見上帝流涕長吁一披腹移取寸椽
并片瓦已堪覆庇逃亡屋百金可惜臺可無薄已憂民除
秘祝歸來偶讀漢文紀稽首吾君繼芳躅

送永平蔣通判

綠煙侵坐草抽芽紅雨沾衣杏著花使君拜命班春去壯
哉行色人矜誇公家愛民不如馬馬在償勞斃償價郡人
日望馬首來摸拜道傍迎別駕君今養馬先養人須知馬
耗由民貧他年布野如雲錦會有旌章下紫宸

題廣東陳氏雪景圖

生綃一幅中堂垂眼前雪景何清奇懸崖絕壁光彩發老
樹幻出瓊瑤枝雲際柴門半欲掩似是白日將西時披氈
戴笠者誰子衝泥傍險相追隨一人前行仰關進蹇驢失
脚雙撐持僕夫荷杖藥瓢舉以袖護頂行遲遲一人騎馬
過橋去橋危溪惡馬力疲二人騎驢各袖手聳肩覓句寒

如痴髯髻指關向翁語須慎險峻毋邀嬉中有一人跨牛
背牛行不動如舟移最後二人從二奚青騾白馬光陸離
囊中琴絃凍且折志在山水誰相知吾聞嶺南天氣煖羣
龙見雪噪如馳從來此景不易得固知畫者勞心思坐令
炎瘴盡消息清氣散入詩人脾

馬學士有詩賀伯父致仕用韻奉答

奎光夜向金陵見學士聲華勞聖眷江南草木亦知名不
獨文人求識面詞臣自古號仙官留都更與仙官便禁鼓
何妨朝卧穩名山一任春遊徧樂極惟愁兒輩覺賦成不
托鄉人薦長安見日未忘情杞國憂天時動念詩諫應陳
創締難筆誅肯代奸諛傳冷語冰人殊不畏熱官炙手誰

能羨先生有似東坡老峨眉也近西充縣奇才背感先皇
知久次宜聯浴堂殿帶看腰下始生花玉在璞中羞自銜
我嗟蒿倚失長松史局相望却生怨代言自合應時須蓮
炬重來還吐燄

送張鳳翔歸番禺

南海三年別東風萬里歸夢隨池草變行逐嶺雲飛宿處
檠猶短唼邊筆屢揮遺珠吾不惜轉眼試春衣

雨中理菊書示星士徐東井

久雨門難出荒庭日易晡竹繁教畧洗花彈欲頻扶迂拙
真何用幽間且自娛過從有佳客無酒亦須沽

聽雨

聽雨門常閉看雲枕自欹閒愁喧燕語浪喜颺蛛絲潤氣
尋書帙浮埃滿硯池連朝親藥裹無興復吟詩

送陸庶子令弟下第南還用吳匏菴韻

退鷁南飛趁晚風休將形迹論窮通玉還荆國猶堪寶瑟
向齊門豈未工捧口自應懷冀北看雲誰復憶江東陸家
兄弟今猶古預識他年事業同

贈王古直

一別霞城知幾年故人多住鳳樓前懷歸每笑依劉客乘
興還登訪戴船老去無財非病也閒來有酒卽欣然詩工
自古窮如此看取吟囊滿壁懸

次韻答婁誠善先生見贈

春來深慕浴沂賢
野外尋芳躋玉鞭
細柳拂衣濃帶露
好山迎客淡生煙
多慚青史曾無補
一卧滄江已有年
心事旁人渾未解
謾誇題柱筆如椽

次邱公韻題周璘秀才書屋

林泉樂事屬專門
殷屋濤聲午枕喧
身似虛舟寧不患
事如春夢了無痕
池隨晴雨頻消長
山與雲煙自吐吞
已結漁樵成逸侶
石床頻坐亦微溫

和馬侍讀秋雨吟

客邊今雨坐誰同
獨倚秋軒詠晚風
池鏡淺涵雲影白
簷紳低映菊花紅
更籌亂耳憑雞報
霜信侵衣有雁通
偈取最憐南北巷
悶懷全露短箋中

寄致仕司空李公時雍次韻

風潭百頃木千章老向林泉喜欲狂
湍急不妨鷗泛穩花殘應笑蝶飛忙
獨醒忍斷杯中物無病將抄肘後方
猶有願豐心未了每逢隣叟問耕桑

徐殿讀舜和宿慶壽寺中用前韻戲簡

容膝齋廬翠壓低筆床茶竈也堪攜
爲隣恨不仍居左樂國何緣却怨西
僧供每分敲韻鉢佛燈堪伴校書藜
憫人咫尺成千里迎蹕還期馬首齊

再和閒齋韻

手栽花竹繞山扉坐閱朝陽更夕暉
架上古書經眼熟世閒塵務到心稀
茶資不入騷人室杞菊能充晏歲饑
只恐

林泉雖久戀好賢還爲賦緇衣

謝見素林公撰至樂樓記用其舊見寄韻

草閣難招花外車但從落日見樵漁庭心有橘誰爲頌牆
角多蕉可學書農事未諳猶硯食仙丹須煉且樓居山房
乞取坡翁記奎壁光華夜有餘

得邸報有異聞感而有作

百年異事駭初聞反袂開緘老眼昏太史豈應侵諫職寒
儒自欲報君恩驪龍領逆難遭睡虎豹關嚴枉叫闢但使
有光爭日月不慚無力正乾坤妖墓寸鉄心何苦駿馬干
金骨僅存烈士殉名元可喪佞人多巧舌空捫唐科詎愧
劉蕡策楚些須招屈子魂事定蓋棺真不朽聲緣憂國竟

須吞干將在獄猶衝斗砥柱當流少過奔文運盛衰關世
運長歌寫罷不堪論

送閣老熊峯石公祭告泰山闕里

一函香帛出彤墀東祀清煩閣老齋七十二君封禪地百
千萬世帝王師新朝望秩遵虞典故國牲牢憶漢祠祝冊
御名勞白署華原使傳命先馳頌聲遠播懷柔後道化孚
昭感格時登躋杜陵遊甚壯低回遷使去何遲秦碑細剔
莓苔字周檜徐攀雨露枝秘跡未緣窺玉牒遺音如或聽
金絲長途記述詩偏富盛禮遭逢興亦奇青簡裁成須大
手鑿坡翹首數歸期

睡起

習閒成懶百無功塵事難侵世累空睡起呼童向籬落菊
花枝上捉青蟲

有感次韻

妖孽纔消一戰收猶煩禁旅扈宸遊皇人縱有瑤池樂野
老翻深杞國憂極北五雲瞻帝座淮南千里候龍舟秋風
忽漫悲搖落鴻雁唼唼在荻洲

十二日早發良鄉復雨

出郭朝來正喜晴通宵飛雨又縱橫泥汙厚土乾何日雷
殷秋山怒未平老馬識途空有志寒蟬抱葉欲無聲雲師
爾罪真難赦何敢常韜日月明

及第紀恩

鵷班濟濟聽臚傳驚喜龍頭屬少年明主拔才真十五寒
儒對策愧三千百官拜舞天心悅六字親題御墨鮮觀榜
共隨天樂去文星燦爛曉雲邊

有詔南宮宴茂材主筵仍遣上公來需雲散彩浮瑤席湛
露分香溢玉杯天近帝居春似海樂兼蠻部鼓如雷宮花
斜壓誇冠重知是瓊林醉後回

聞宸濠就擒志喜

中丞有力正乾坤四海方知一統尊已痛湖波成赤水久
疑日食似黃昏甲戌八月辛卯朔日食晝晦其占諸君幸
爲諸侯謀王其國不昌終受其殃諸君幸
免長從戍百郡仍看早啟門更祝天王憂社稷莫教愁亂
向兒孫

折屐呼聲不自由，馬軍持捷過滄洲。
稱兵誰敢侵金闕，拜表還應賀玉旒。
天上飛龍須有象，甯中饑蠱定含羞。
也緣孝廟栽培久，報稱今多第一流。

題淵明歸去圖

潯陽江頭泊歸航，松菊未老田園荒。
躬耕猶足辦酒漿，公田有秫儘可秧。
斗米折腰亦何妨，建康銅駝荆棘傍。
天門折翼不復翔，股肱苗裔非尋常。
晚節恐負秋花香，肯將僞命污冠裳。
葛巾一幅聊徜徉，生愁醒眼多感傷。
醉臥且納薰風涼，睡鄉樂境同羲皇。
作詩沖澹味更長，荆軻八咏乃激昂。
胸中七首藏雄鉞，知心千載有紫陽。
汗青老筆生幽光，詩名康樂與頡頏。
追念祖德能掄揚，竭來有意思張良。

胡爲復綰大守章竟使首領埋炎方乃知自立須堅剛見
幾而作易所臧披圖嘆息聊題將仰止廬阜摩青蒼

砥柱亭

中流孤嶼湧雲根山著危亭勢更尊吹斷海風非盛市鑿
開河岸起龍門名高砥柱新題扁釣喜苔磯舊有痕地主
多情于我厚吟詩還擬到江邨

象麓草堂

清賞方追往昔歡有泉堪飲石堪餐已知晝景歸摩詰一
任墩名屬謝安突兀翠屏千仞立幽閒草屋數椽寬匡時
更仗紆籌策莫信韓非著說難

柴埠津

一聲兩聲牛背笛三石
杖閒行古渡頭

一隻漁人舟江邨風景描難就倚

羅 玘

玘字景鳴號圭峯南城人出李西涯門詩文奇古
不爲苟同舉成化二十三年進士除編修歷南太
常少卿吏部右侍郎正德中疏劾劉瑾復忤時宰
致仕隱居山中病革時聞宸濠之變移書討賊投
筆而絕贈禮部尚書諡文肅有圭峯集

送金侍御巡按雲南便道省親

鶯花盡春空驄馬行利闌開關度鳥道猛欲鏹疊嶂雲開
蜀山高星宿夜依依傍望雲望父母更在星宿上有身願如

鳥插羽學飛颺揮戈退白日一日紛百餉人言肝是鐵肯
換鴟作杖王事有期程飲冰覺心快驅車出門去惘恍迷
所向如逢點蒼山更上山頂望

送張佑之監德州倉

郎吏頭漆黑心有大機軸司徒眼如電晨降檄一幅入門
絕經營已飭車轆轤老父坐車上橫身任爲僕幸逢德州
程九水一日陸船頭魚潑潑船尾鷗逐逐晉人不知船老
覺船是屋且令買魚烹更欲伴鷗宿公衙幸少休可報酒
初熟玉浮暑池歎金汎秋籬菊我能捐千金誰有愛日鬻
么麼爾委吏自束縮腸腹慎勿莽饕餮人自念鞠育

送周主簿任南城

連山抱如環過水縈城脚軍州自古置小邑舊附郭蒸黎
戀門閤不厭土地薄神泉粗可醺出境配靈藥門無催租
吏家有斲地鏹市女面無脂野老巾不著囹圄寂生蓬蒿
門可羅雀謬當封藩圖一變百病作黑夜騎屋山白晝面
相縛竊虞鑽泥鮎化作掉尾鯉觀君饒道氣秋漢橫一鶚
老夫頻搔首仰面望寥廓

送曹進士知貴池

到江真幾里爲縣可三年心自難忘蜀官還只住燕鶯花
紫別酒楊柳夾行船向日登瀛客相期禁禦邊

送戈侍郎赴召

老於離別倍傷神珍重單車赴召身喜見王師颺赤幟免

逢黎庶逐黃巾重縻好爵周班舊邵厭刑書鄭鑄新瀛海
東邊幾隣並依然相逐笑公貧

寓言送李希賢

山僧下山時重送不出山但問下山僧此去何時還乳水
閒一孔白雲留半間祇恐僧還少僧還誰閉關

泰和禱雨有感爲吳德純作

金華山雲如紙薄澄江赤日燥欲涸田家生怕牛饑死滿
田焦禾任牛嚼禾盡牛肥尙可爲縣吏催租出牛縛縛牛
到市多賣錢了租背上無膈膊新傳縣官昨夜到坐席未
煖行出郭西郊暮地陰雲生狂雷一下顛快閣雷聲轉大
人轉驚兩耳何曾聞雨落君不見縣官騎馬入縣門猶向

山頭望雨脚

送劉侍郎往邊

大旗颭軍軍吏集赤日射甲甲流汁將軍纛載胭脂馬此
馬遇敵慣先入馬芻軍糗高於山千乘萬乘填邊關三軍
久飽思一戰萬弩齊射血流丹自昔內附比臣僕繒帛裹
頭鞬束足忽憑詐力侵我疆不知以我爲心腹吁嗟天心
人共知急投鎚釜同沸糜蒙昧作愚鬼奚今配行尸華容
云來爾得知公手可天雨公心妙神施戰者自戰炊者炊
偃月勢變更魚麗雲梯作之巧於鍾有穴可掃庭可犁吁
嗟騷動者傾覆戒前癡公歸行勒平成碑

題曾光表山水圖

我恨不如江頭人茅屋四壁旁無隣茅穿雨漏歲一縛松
葉爲蓋沙爲茵大兒五更催解纜去時冥冥天尚暗老妻
走出呼小兒大兒小兒下幽砌小兒髻如椎年可十七八
振然汲水勝過獺平生兒魚偏好殺穿從龍國恒探珠若
遇鮫人敢管撻輕風飄飄日卓午魚賣江邨曬魚罾偃然
一笑載酒歸人謂此實魚之虎橫江中心翻白波小兒船
尾發棹歌白頭老翁喜奈何我有嘉客新相過十年不見
鬢較皤矢口論事如懸河黃庭一卷讀已多老妻肘翁云
靡他翁呼濯釜燒檣華我見船歸置鐏簋豈無大魚大如
豕君不見良工畫翁畫客畫山亦畫水意在江心兩兒子

鵲惜綬鸞信影孔雀愛金尾鴛鴦重鴛領在世安有秦西
巴獼麕殺孩子亦肯俛啄仰顧活須臾虞羅得汝汝飛頂
嘴銜魚婢不得飫不如饑學露蟬飲嗟哉象以齒焚千斤
驅汝身雖免爲女虞

脊令圖

破獍食其父鵲梟食其母彪虎一母生母去彪食虎維鳥
恒反哺維鴈行不補鵲鵲鳥之微友義良獨苦雖無華蟲
交舌不逮鸚鵡飛鳴行搖搖急難亦堪武疾風一枝安百
鳥誰敢侮

送蔣敬之甥歸湘

人言湘中風我未識見之掀土朝煙筍泔麻夜燃脂筍綿

緯成筐脂光照縹絲綦蝦蟇人饌拒粒不堪炊屑麥僅蒸
焚釀秫甘歆醕棄餘人隣疆販駟權不訾豈其自知盈恥
與操羸奇漸涵入骨髓耳日常塗迷自非上供輸白首無
別離百屋如處女何能擁高貲子舅始我言厥初咎之誰
譬彼行爲山一簣請自茲顧子亦舉舉雄飛不能雌一楫
割甥舅張弧射羣疑曲踊吾甚武拉鶯掇胡荽豈能媚庭
幃昵昵兒女姿湘土善敏樹湘茶味如飴彼飛雲中鴈樂
以無繫維秋風片帆白淡月照所思歸語湘中人吾言百
世師

送太守之開封

濁流亘混混古有闢其邪茲維大地中九州交達衢尹實

冠中夏奚與百郡俱四十守令下吏前合雲鋪中庭忽聞
雷百諾應一呼門如納百川纍纍入縣輸千輛復百輛上
供及軍需曾無遺毫毛邱山積負逋地大物甞甞隔身雜
曜腴隄防或濶略立地生麻胡一倡百和之自立落鴈都
坐令清平民入市愁於菟吾子起陽曲而翁烈丈夫自臺
徂名卿子亦汗血駒戔戔白雲司明月懸秋壺大姦梗大
獄如以手拉枯久結司寇知或徹公與孤舊尹新去位寧
容間須臾子才望年資流九落甌與橫金中大夫手握銅
虎符西落太行山田園未應蕪登高望淮南心與白雲徂
男兒志事業父母離憂無舊聞馬可釋勿謂龍易屠覆錦
式昭甞知雌當辨烏吾觀聖賢心川澤多納污壁立萬仞

強攀躋竟無途江湖多風波宣父有巨桴吾衰不自量予
今黑頭顧

環翠亭爲門生吳廷亮父南坡作

白霧下赤壁素月篩青林風露變草木魚鳥解晴陰蛟潭
湛滴滴鷗波去沈沈島嶼上下勢舟船來去心此亭對此
景一鶴與一琴琴音諧韶濩鶴性甘蕭森春濃十里竹秋
靜千家砧象罔冥蒙合雲雷屯伏深主人葛天氏不言有
朝簪

送呂知縣之太寧

山行有虎溪有蛇人行百里無人家邨氓生怕到縣市更
有蛇虎紛如麻朝廷養人如養子此輩毒人蛇虎耳明朝

忽報新升來震驚百里飛狂雷虎耶蛇耶在何所山翁隔
溪相喚語此縣百年無此舉

壽丁坦翁七十詩

非僧非童頭亦髡行年七十口自言十二月吉置高尊天
瓢酌翻麻姑源忽驚趺突噴火敦當壚彪彌犢鼻禪霓裳
舞隊集良媛西河渾脫傳梨園曼延眩人雜黎軒綠椿飛
空弋縣猿過雲仲麓和伯璵王母欲下雲旗翻委以錦組
綴璵璠彼姝翩翩駐西奔靈藥詎恣蟾蜍吞刀圭入口到
骨恩羣仙騎鯨上朝元鯨饑吸尊涸無痕漉其茶壘無司
閤遂令鬚髻百孟賁中道而立要朱轡誰更口大張如盆
坐之上座享禮繁勇爲吞海爲世婚尊邊尾閭幸我存飲

河飲渭其吾孫

遊方山路間定韻與石樓志別

相逢盡道乞還山公乞還山便得還浮世功名碁局罷百
年光景釣竿閑穿雲蹻磴疑天上到寺對僧如夢關關日
河橋盃酒後月明千里隔陽關

宜興堵安母慶壽圖詩

吟肩瘦聳晚山寒淚眼如何濕未乾心向夜爐灰久死夢
回風燭骨先酸少曾鬻髮寧忘苦老得含飴始覺難西掖
詞官舊鄰並憑誰傳作畫圖看

和江殿讀齋居韻

漠漠昏鴉飛遶堂抱欄吾恰到西廊謾拈短燭尋詩壁笑

見斷瓢支敝牀家遠青山難入夢時清白首好爲郎不慚
衰朽迎歸路貪看梯航集萬方

李漢

漢字立昭武寧人與羅圭峯友善成化二十三年
進士由庶吉士授刑科給事中常奉使寧藩贖金
一無所受胡右爲斂色未及大用而卒

看鶴亭玩月

華表歸來鶴影殘月光斜照水波寒清閒擬結神仙侶十
二碧城空畫闌

楊廉

廉字方震豐城人崇子成化二十三年進士官戶

科給事中以地震劾用事大臣累至禮部侍郎武
宗南巡命百官戎服見廉不可嘉靖初遷尙書乞
歸與羅欽順講居敬窮理之學學者稱月湖先生
卒謚文恪有月湖集

讀書臺

日光斜照碧巘岼滿壑清輝上石欄芳樹不從秋色淡蒼
苔常映屐痕乾雲山當日誰知已烟水斯時起暮寒葉落
我來空悵望數邨野火接高巒

登玉枕山

玉枕高橫修水湄歸來空有臥雲思鏡中白髮搔逾短道
上黃粱熟更炊萬里風塵催我倦百年心事與誰期從今

學得南華睡花落花開總不知

憶澹臺墓寄王邵二藩臬

孔孟久絕響希濶到敦頤隔此千載餘是果真無師嘗聞
夢奠後弟子皆四馳滅明遠居楚三百門徒隨後來必有
傳韜晦人不知濂溪實楚人所得宜在茲要知南方學澹
臺其始基步出豫章城旅墳荒路岐古今一名流所過多
有祠道學乃何物冷灰無人吹幸逢諸當道尙德甘如飴
此事倘留意足慰悠悠思

過牖節莫水部

疎牖密牖連一帶南船北船此關隘往年大小謹啟閉十
日五日牖邊待今年濟水偶然溢雪浪崩騰復砰湃下如

落井上登天三老無功神是賴誰移兩山作一門管束千
流與萬派當初本爲蓄水設豈知水大亦爲閼世閒未有
無獎法十利未免兼一害人言月河且緩築不然水勢無
由殺征夫自是懷往塗見月望弦今已再履霜又恐阻冰
凍帝鄉尙在紅雲外噫嘻水大莫怨遲還勝從前水小時

歌風臺

被酒徑澤隆準公巨蛇濺血汚劒鋒鬼媼啾啾夜深哭紅
旗盡滿山之東入關堅守牧羝約親與降王除面縛以寬
易暴法三章告諭秦民皆喜躍董公遮道天遣來發喪義
帝師銜哀嘗聞伯者假仁義漢帝一著先胚胎范增趣舞
謀自拙玉斗何辜碎如雪傷殘所過無一言惟對君王數

持珎一仁一暴勝負分况有豪傑紛如雲義旗東向無不
捷蹙項直至烏江濱歸來豐沛乘黃屋醉後高歌仍擊筑
千秋游子思故鄉特令此邑爲湯沐我來登臺正落暉兩
碑對立高牆圍臺邊古井不可問千年事往人民非炎漢
開基未爲窄泗上荒臺僅尋尺興亡百戰無代無登高一
嘯秋空碧

折桂寺

境是浮屠勝東南秀此峯澗流千丈瀑崖長萬年松少室
留蒼鹿番君現小龍布鞋從此製雲嶠寄遐蹤

道傍廢宅

破屋三間古道西蓬蒿門外與腰齊鼠留舊穴妖蛇入雞

別空峙野雉啼庭草有痕曾接燒土墻無覆半頽泥感傷
豈獨王承福馬上行人亦慘懷

王大參寄示邵提學登滕王閣弔徐孺子墓詩

檻外長江水接天諸公壺矢正錚然新詩寄到殘年裏高
閣登來廿載前自昔三王皆雋傑如今邵子亦神仙良時
盛會無由再南浦西山意獨懸

同寅羅緝熙宅梅花用王懋學韻

花譜從頭仔細評此花偏是出塵清真香不藉風吹送老
幹何憂雪壓平寒入玉壺無曉夜影依窗紙定陰晴乾坤
消息南枝上欲起伊川一證明

瑯琊寺和莊定山韻

山入瑯琊不計重沿溪秋水映芙蓉肯辭披草尋幽徑安
得誅茅住碧峰盤谷可當韓子序武夷應有紫陽蹤老僧
曾得西來意盡日跏趺對古松

開先寺讀書臺

僧房五百架廬峰鑿谷開巖重復重挾策昔人依薜荔登
臺此日宿芙蓉西來慣說庭前樹洛學能參寺裏鐘最愛
山中杉檜古月明窗外半虬龍

贈蕭凌漢巡撫兩廣並寄蔣敬所閣老

姓名當日重金閨不負平生氣吐霓品秩峻登臺左右恩
威行徧嶺東西公廳綠滿榕陰合驛路紅深荔子迷循拊
韓公推第一願言聲望與山齊

人物當今房杜流清論冰玉重山邱追隨祕省如前日調
燮中書已十秋天上肯辭黃閣去人閒徑作赤松遊九重
回首思良佐何必勞神夢卜求

送楊惟高先生致仕

一日能歸卽是仙莫言華髮已盈顙夕陽江上收帆早半
夜何妨浪拍天

畫菊與汝愚同賦

好事持醪莫謾過餐英擬和獨醒歌傍人祇愛寒香遠知
受風霜是幾多

李大同

大同新昌人成化中官本縣訓導由薦辟遷刑部

郎中

白澤荷花

故老相傳白澤湖旌陽一濯潔難污只今尙見荷花在未
識神僊更有無

查仲儒

仲儒字學夫寧州人成化中貢士眉川通判引疾
歸

遊南山

小寺江邊露碧孱綠崖結屋異人間松枝屈曲陰浮地水
氣高寒瀑在山歸牧不妨牛背卧野僧渾與鶴身閑新亭
風景依然在尙有笙簫送客還

潘葵

葵字日臣浮梁人成化時諸生有志性理之學精
易數於皇極洪範諸書各有發明有石室集

葛仙祠

一生行樂及春時爲乞丹砂拜古祠藥鼎緣餘仙犬在津
橋恨有杜鵑知野花爛漫過三月風竹蕭疎只數枝堪笑
傍人應不解欲隨勾漏共題詩

楊穠

穠泰和人士奇予以廕補尚寶丞成化中進太常
少卿掌司事

捕蝗歌

捕蝗捕蝗日當午東邨捕過西邨土大家小戶不敢停蝗
日滋兮民日苦吞蝗曾記唐宗語亦有中牟好明府大江
之北遺蝗多誰信江南遽如許嗚呼民害豈獨蝗苛政由
米猛於虎

春思

青鏡衰顏倦眼看當春情思較無端書多漫擬荊州借米
貴方知蜀道難細雨驛樓芳草台晚風僧院落花寒空山
寂寞虛招隱皂帽從容管幼安

羅 鐔

鐔南城人玘孫成化時由祖廕入監讀書隆慶中
以子繼宗贈香山縣

桃源祠

石梯雨過綠苔斑
竹洞雲深白晝閒
長恨桃花太飄薄
誤隨流水到人閒

符

蓬一作蓬

遂字良臣南豐人宏治二年鄉舉知興化賢聲徹江北泰州有滯獄奉檄往勘一訊而服秩滿擢金華通判以忤劉瑾黨未行而罷家居日十年卒有歸田稿特立堂集

過了溪甘仙師祠

仙師祠接梵王宮
伏臘猶能走野翁
獨有孤山舊書舍
荒鴉啼斷暮煙中

行觀

觀宇衍觀號活溪新喻人宏治三年進士歷官廣
西兵備僉事有政聲鹽賊搆亂計殲之遷山東叅
議不赴請老歸有活溪存稿

堂前鵲雛

堂前杉樹枝雙鵲巢其上鵲知主人心彈射故無恙日久
聞哺雛銜食時相向二雛羽翼短學飛不盈丈一雛忽墮
地雙鵲鳴悽愴小奴攬雛入意欲供朝餉遂令還其巢長
竿使依傍此雛得全生雙鵲喜飛颺物性欣已遂民患消
未暢苟能禁吞噬萬物免殘喪旋機在須臾乾坤歸浩蕩

閒居

宦轍東西鬢已疎得歸今喜遂閒居
深林已報還巢鳥密網難求縱壑魚
山水有情供杖屨詩書無恙勝菑畝
悠然身外堪觀化回首紅塵午夢初

清明雨

江郭經春少放晴邨邨烟雨又清明
牧歸南畝閑耕犢人在東風怯囀鶯
三里松楸空極目一株楊柳尙關情
介山殘燒同惆悵寒食蕭條過半生

贈荷峯

髫年相見兩開襟晚息名山共此心
遠客休談朝市好幽人祇愛薜蘿深
長鑱紫蕨鋤雲種短屐青藜步月吟
萬種風花輕過眼要看雛鳳立梧陰

王統

統臨川人宏治三年進士官同知

南征凱歌贈總制陳都憲

有序

吾撫入國朝百數十年沐浴聖化又景仰鄉先哲
道義如吳公文正文章政事如晏公元獻輩思欲
進今人于古以故風俗醇美不在諸名郡下比水
旱洊至時政多乖賊起饒州之姚源南昌之華林
瑞州之馬腦而撫之東北羣奸亦四起遙爲犄角
所過戕賊民舍一空以長久文懿之區而至此可
哀已聖天子軫念廷選堪命者得湖南陳公綜理
其事公卽日就道區畫設施不旬日閒一鼓而下

空其巢穴而姚源諸賊聞風靡矣邑之老稚舞蹈
歌頌颯颯洋洋予目擊盛事能不倚歌而和耶

東州野老吞聲哭有似杜陵曲江曲一朝悲喜如轉轂歌
聲笑聲振林木奸雄崛起臨汝東民命墮落湯火中聖明
咨訪得我公天戈一指巢穴空姚源諸賊聞風靡長風淨
掃一千里豐碑戢戢續可紀白叟黃童頌聲起向也民傷
骨肉殘只今坐臥安如山嗟哉公功永不刊北征請和昌
黎韓

謝家埠

卸卻孤帆野水涯黃塵撲面走征車白沙翠竹不多路茅
屋竹籬凡幾家山脚雲連烏帽沒樹梢風颭酒旗斜眼前

景物供詩料獨有寒梅未肯化

劉寬

寬字彥博大庾人志意高邁能爲古文詞宏治三
進士終崖州學正

呂仙丹井

此井傳聞呂棄丹盡言飲可駐朱顏如何道士相逢者三
十年來兩鬢班

徐威

威字廣威泰和人桑民懌門人宏治五年鄉舉授
鄖西教諭

中秋詠懷用杜子美秋日述懷一百韻和寄柳州倅

假鳴桑先生

異鄉青嶂外故里白雲邊
北極懸雙眼中秋度四年燈前
橫一劒江滸宿孤船玉露溥溥好金波炯炯然
山風徒自潤儒俗不同遷
對酒輕千日論詩嗣百篇
斲才猶見朴礪智未成圓
自是窮荒地誰憐落寞天
梧桐牀護滿蟋蟀井吟偏
何處尋靈運無人問稚川
寒巖巢燕別疎竹網蟲懸
市賈希求紙民儲寡守錢
囊餐麓乃習衣褐短堪憐
名谷非甘谷稱泉半盜泉
土城門不警竹屋壁常穿
釣石唯咨背輿臺祇食肩輿駭
千百種秀敏幾多員獵野狐偕走燒
雷蟻並緣誇酣言沓沓鼓飽腹
便便定靜龔疑吹晴明鼓
河烟立名甘在下恃氣或爭前
肥醜紅樓女粗豪魯洞仙

城隅頻有約淇水久相傳淦淦重嵐晻淠淠小澗潏背恩
棠遂伐忘義豆長煎胥學凶如蠱無慚行有羶豚蹄祈殖
穀糟酒樂登筵墉集欺猫鼠林藏逐雀鷗禮羅誰共入憲
網底粗悛腐木難勝斧孤雛叵受鋌整冠迷狎李稱物昧
持權天德勞循撫人愚苦係攀樹藩吁格迹作縣失烝蠲
平讞翻遺囂催科絕勝收穢汗無與汰殘忍復叨全私有
千端計公無半語宣執鞭深結友握槩惡親賢富視銅三
百貧量石二千中諄言可醜有北爾當先反笑人驚鈍私
揚已驥翩謬爲施舞袖暗弄卓奔絃僞狗姑盛行非魚罔
寄筌斯人宜罪也夫我豈爲焉自昔圖通變而今謹折旋
第令心怏怏未極理元元諸子新梁肉羣經舊井田鸞鳴

將日近鵬舉欲雲連何苦原衣弊難更肇錦鮮平瀾寒負
未陰壑夜鳴舷冷落千軍筆紛披十樣牋廉都多寵顧貪
守一拘牽固謂身無絀原來命獨遘崑山寧玉棄合浦敢
珠捐踉蹌騰高浪參差始碧漣悠悠江至澧浩浩洛吞瀍
對客封佳句思親夢故阡甘心和氏璞覩面祖生鞭嫫母
聲兼惡南威色喪娟噉噉秋塞雁嘒嘒晚林蟬傳世心如
錦回天力未綿馬融先解帳鄭老疾推鹽幼子攤書籍嬌
妻問翠鈿乾坤無廣廈風雪壓危椽泛慕滄溟際行思岱
嶽巔五窮延使坐三疾彊令痊日嚼如瓜棗時尋在火蓮
拒隨昌寓乘嬉射長房拳偈劍悲圖駿徘徊笑卜鯁斂容
過世梗負汗逐羅襦炙熱誰何欲隨流恁地消摘蘋聊涉

汴務稼暫依孺緬爲知心惜難紓渴思纏晴岡靈鳳啞旱
歲老龍眠惡守邪谿黑勤磨大道堅胸襟真濩落翰墨獨
瑰妍旣作鵬同起休論鷄少翮數精卑一行詞正壓優旃
氣象凌雲漢光華逼斗躔居今仍齒齒覽古愈虔虔珍敵
西南英雄排左右甄上台凝望銳寄字遠求駢京賦人爭
寫麟經手續編小官居不愠健筆秉須專白下岩鳴鐸長
沙省佩弦仗明誅瑣伯吐愛學乘禪爾雅言言熟傳燈字
字詮賈生讒自漢郭隗起無燕門第懷明道家人念閑騫
久孤黔首戀肯與瘴江延寫別衣皆泪求親道欲涎山長
空寄鯉春盡好聞鶻牛女縞猶結參商轂怎旋盪舟如得
泉辟穀苟逢仝閭闔須臾啟文昌瞬息褰世閒驚兩鳥眼

底盡飛鳶脫後前人步終貽半世愆
西山書每附浯石頌
宜鐫處處青春在年年碧草芊
壯心期不已浩氣亮非孱
韓柳拼來擇蕭曹幸免銓

九月一日遊懸鼓崖

秋風懸鼓下烟火兩三家曲折通崖徑蕭條倚樹花
蛩聲如互答人語半聲牙酒盡青山暮歸鴻背落霞

舟中夜夢廖同年孔服作詩二句覺後足成一首

文章憎命達何況飽羣經坎壈投長劒稽遲夢短亭衝風
迎駭浪孤雁起寒汀相憶雲山遠樓頭夜數星

九月

湘北雙懸淚江南幾得音
重陽今五度泮水只孤吟
對菊

聊傾酒逢人不鼓琴縱然方朔起難爲卜浮沈

初夏寫懷寄林先生

講堂萬卷古今文車馬炎炎過不聞平地江湖三日雨
空樓閣半巖雲草知深意年年發酒戀枯腸日日醺
冷暖不須分桂李臭香從古說蘅蕭

過安陸寄東郭同年本寬

秋風吹水各西東怪事無勞問太空安陸江頭一杯酒
月明寒浪逐孤篷

登洞賓亭

敬爲先生拜此亭秋山澹澹樹青青書生苦被文名累
始羨長吟過洞庭

送李司訓壽夫之繁昌

十月梅花早報春
相思日日倚斜曛
仙亭獨酌杯中酒
顛倒東風忽夢君

王緒

緒字紹夫樂平人宏治五年鄉舉授嘉善訓導歷知四川忠州多惠政有鳳歸搜枯諸集

激頑歌

激頑歌頑奈何
翻手幻雲雨側足生風波
昔年盟言指皦日
一旦巧辯懸長河
沸騰鼓亂蛙愚暗
驚飛蛾不爲蜘蛛網
卽爲烏雀羅六街三市盡
如此人閒安得無干戈
嗚呼頑兮可奈何

何文魁

文魁彭澤人宏治五年以貢生薦於朝官杭州府通判

狄梁公祠

回天有力決神機扶得前星上太微
百里無慚孤鳳翥九霄還夾五龍飛
籠中有藥功爭效嶺表看雲夢亦依
却歎房陵脈春色門前花氣襲人衣

羅欽順

欽順字允叔號整庵泰和人宏治六年進士授編修潛心理學初由釋氏入既悟其非乃力排之立朝屢疏言事皆不報歷南京吏部尚書乞歸時張

桂用事恥與同朝再召不起卒贈太子太保謚文
莊有整庵存稿續稿

自勵

昔聞爨下桐乃充伯喈琴知音苟不作山水徒高深平生
守章句中歲勤溫尋新知能幾何淘沙初見金聖賢諒非
遠萬里行自今精神誠所相無虞力難任以茲恒夙夜聊
欲忘華簪

我我數仞墻百官紛濟濟眇茲墻外軀所見諒無幾高門
日夜闕欲入誰余泥奈何迷不思竄身荆棘裏

紫陽基下學象山明自然自然豈不貴母乃流於禪百年
公論定畢竟誰爲偏昔聞昌黎語刺死失其傳皇極久不

建西教擅吾權孤風邈難嗣缺月淡寒川懷哉白沙老九
原應執鞭

季弟允恕家居十有五年幾若與相忘者茲再被召
命長銀臺無復可辭於其行也賦五言古詩一篇
送之

山林間人跡抱此幽獨姿幸有同氣人出入相攜持外物
復何有真樂良在茲悠然天壤閒百歲以爲期季也志尤
偉閒居亦孜孜積書早充棟博覽仍精思上下數千載歷
歷如見之庶幾經濟業豈曰華藻爲憶昔嘗在暇頗受先
皇知金門敷奏下退食每委蛇歸省待寬告養疴竟棲遲
手栽西墅梅結實已累累天家新萬象求舊靡遐遺珪璋

言集 卷五十二
三
敢自擬特達蒙恩私趨命理宜急圖報今其時畫船雙桂
棹宛在澄江湄君當別我去我老將安資相送不能遠夢
寐還相隨微霜清遠驛到處堪題詩殷勤寄魚雁以慰長
渴餓

同諸士大夫議鄉約於龍福寺約成賦詩分韻得君
字

禪榻豁清晝深虛隔塵氛雨餘山翠入林靜鳥聲聞嘉賓
何濟濟跋涉良已勤非貪涅槃趣思整時俗夢坐中三大
耄笑語芝蘭薰羣英亦駢列意氣凌青雲道同聲自應彼
此曾何分揮毫已具草命酌還論文長年懷契濶茲會餘
清芬清芬諒無已卽事期所欣庶幾萬分一荷以報吾君

石江爲歐陽光祿賦

骯髒人所憎脂韋人所喜世無骯髒人滔滔將誰止伊余
素寡合晚得石江子自云性骯髒託物以喻旨家住蜀江
濱江流清且駛有石橫亘之何由日千里素懷及物志而
昧圓通理方心剗不得機變乃深恥坐此礙吾行以石還
自礙余聞不謂然此性實天畀能令憎者畏所向率風靡
漢廷黯誠慙邪謀爲之弭累百公孫宏論功安得指在人
明有徵在物豈殊此妙用貴無方慎終請如始

同允恕弟遊金魚別業次韻

夜榻共論心前邨更一臨倚樓都近水栽竹漸成陰帆駛
風初正尊殘日未沈坐聞吟五字憂思覺同深

東同里曾氏諸親

忿來不管珠彈鵲
惑解真成鐵化金
物我平觀無一事
眼前消得好光陰

遊青原山

朝訪名山露未晞
翠嵐浮動欲侵衣
坡頭路轉松陰合
隴上人閒豆莢肥
泉響遙聞心已淨
寺門初到夢先飛
從來膜有煙霞癖
爭奈行藏與願違

學古樓

家住西岡地最幽
門前屋後盡平疇
一溪流水去無路
四面好山來入樓

何屋

原字朝舉號蘭皋新城人宏治六年進士歷官南京工部員外郎督畿真州率民掩暴骸疏商舟之滯以忤劉瑾出知程藩府酋人感其忠信後致仕歸聚徒講學自號仁峰著有易經諸解

山中

早歲曾遊地重來髮已華
山寒初衣袂寺僻欲移家
佛髻石千古仙音泉兩崖
吾人采真處端不爲琪花

周季鳳

季鳳字公儀號來軒寧州人季麟弟宏治六年進士授刑部主事尋陞員外郎累遷至湖廣布政使平巨寇正德嗣位切陳政六事擢右都御史巡撫

應天卒諡廉惠有來軒漫稿

釣臺

明月灣頭路清風釣艇絲乾坤才此老風節是吾師修水
千年跡崇臺兩字碑祠堂枕江岸古木正參差

幕阜山

迢迢幕阜嶺壁立與天齊吳楚依江畫星河入夜低瀟空
飛白練拂樹見青霓獨有樓中客清風入杖藜

艾城

來尋雉堞已稀微贏得孤邨對夕暉漢篆盡隨秋草沒遼
禽空與暮雲歸侍中古廟香烟在鴻翊遺墟大樹非立馬
西風頻指點鬱蔥生氣尙如閭

劉麟

麟字元瑞安仁人以武功隸南京遂家焉宏治九年進士除刑部主事出知紹興府忤劉瑾削籍起太僕卿歷工部尚書致仕自稱坦上翁卒諡清惠有南坦老人集

留別孫太初

夕燈蛩語上空堂門外芙蓉泊野航逸興與鷗常作侶離魂入雁不成行黃花對客年年雨短鬢彫秋夜夜霜岐路漸多鄉國異天涯戎馬又重陽

山居

十年山館始圍牆竹裏開門筍正長但坐小車行得過不

嫌春露濕衣裳

南坦讀書臺

芟却侵輿竹來聽轉壑泉
花開齊映谷柳老欲飛絲
弱子將迎婦鄰翁許借錢
讀書臺下雨種玉比藍田

述懷

今我樂矣敘舊以賢瞻彼明德不以厥年生計匪多尺宅
寸田暮色惟暝返照則鮮君子保終夕厲惕然載我元酒
踐彼初筵悠悠我心無懷葛天

寄文衡山

戲馬過芳春征鴻逆新暑
去住本無心隱顯不成侶
令德自有鄰予美胡獨處
東野昔爲雲泃城今欲雨
夜發吳門

書所恐清溪阻迢迢鶴髮人待子聯膝語

桂竹詞

桂香何冉冉不以春吹噓竹枝何青青不以寒卷舒所以
學道者愛惜如璠璣窗軒當其下琴書與之俱感彼賦命
偏忘此生計疎老色朝無賴秋聲夜有餘荆南王子粲於
世竟何如

憶慧逃禪

老衲歸真久前山春草青古鉢仍留飮疎燈不照經瞋色
寺門月晨光佛殿星舊時香火伴滄海見孤萍

閒居

撒屏徙山色開門待雀羅已與妻孥遠無煩賓從過積雨

雞聲近流塵鼠跡多龍珠辨亦苦光影發雪窩

與吳甘泉

自家五湖上弄水輒忘歸落日看蓬鬢臨風澣故衣食貧
隨自省傳病見官稀舍比林和靖寒梅正掩扉

恒陽餞喬白巖

雨昏書劒對秋看長路冥冥生晝寒時羨叔孫終制禮人
榮疏傳早辭官交深不謂離羣易才大惟憂用世難一笑
浮圖高處別此中猶可望長安

湖上晚渡

老興翛然得自由清閒穩踏五湖舟花開酒美不一醉水
滿月明時獨遊處處登樓頻吊古年年垂釣儘銷憂臨流

莫負滄江興夜度香山蘆荻洲

與西溪甘泉聯句

幽談不盡坐寒宵
懶性真能遠市朝
臥向好山猶是夢
飲從鄰叟不須招
燈前白髮人俱健
身外浮名念已銷
它日里中還結社
一溪風月醉蘭苕

與吳甘泉登董嶼絕頂

山當天半氣全清
影入湖波覺世輕
足下過雲應縹緲
此中看月更分明
狂來欲賦傾才思
醉後重登是性情
却向歸樵時訊問
轉疑深麓可逃名

山中偶成

林扉過雨曉風開
曲逕花香碧澗迴
一卷道書尋未得
山

禽飛過竹梢來

逢僧

懷元默默向誰探
小寺逢僧始一叅
日暮孤舟風浪息
滿篷花雨白鬚鬚

酌故人有感

鄉井多才俊
睽違柰老何
著論人羣少
修文地下多
得意不能薦
感時聊自歌
酒杯有深味
百歲幾經過

山居

鐘定添香坐
雞前宿火眠
競辰聊散帙
入已卽逃禪
永日圖南榻
輕風范蠡船
若無風雨病
不負古稀年

東岡一山

雞犬下柴扉桑榆轉夕暉力食知今是酣觴過古稀
杪秋辭藥物中夜攬裳衣道情無著處風竹正依依

黎鳳

鳳字乾兆號楚蒙新喻人宏治九年進士官提學
御史有剛直聲遭讒罷歸名其堂曰蒙耕

冬夜感懷

物情良可嗟時事已如許江湖此夜心分付窗前雨
浮海不得濟問天亦無語緬懷古人心鬱鬱良獨苦
薰蕕不同器燕越各異土咄嗟隨時計調停欲何補
陰霾苦連旬紀歷成往古瞻望泰階雲寥廓仰天宇

送李夢陽督學江西

晷刻清光下奔趨自絕塵乾坤留碩果湖海著斯人王化
寧無補儒風坐見淳庭空涼月夜北斗倚高旻

過德安至東林夜宿

駸駸匹馬自東林秋雨秋風滿客襟玉井露涼梧碧瘦疎
塘寒近蓼紅深江山信是詩人骨冰雪堪盟野老心獨對
青燈憶時事清齋無語夜沈沈

守素

綠槐門巷白蘋洲吟過春光醉過秋到眼風花渾是夢置
身邱壑更何求水流須信石不轉山靜任教雲自浮君看
萬松枝上鶴一巢從此占清修

霜軒

誰家結構倚雲蘿分得空明雪一窩
虛貯玉壺春有連徒
消冰柱水無波吟來清逼梅花瘦
醉裏寒生夜月多縱使
東風動寥廓瓊樓天上肯消磨

仰山

樊圃平平忽見山九華三島笑談閒
層巒突兀無多地曲
水縈迴白一灣石古也如僧入定
天空不碍鳥飛還壺中
多少詩家景何用巾車日欵關

行次水口友人見寄次荅

停雲清思倚欄干放艇尋君一會難
晝景恰逢三月好春
衣猶帶昨宵寒玉堂仙筆驚風雨
烟渚漁歌罷釣竿珍重
籠中閒藥物萬家歡宴是長安

青山聳翠圖

一樹孤撐入漢青巍然朝暮閣陰晴雲開絕頂芙蓉出雨
洗懸崖翡翠明有客采芝供歲暮何人伐木度春聲清洲
迴隔紅塵路拄笏相看有勝情